

Ukanikorongi u Kagita u Bituru

Ukukpa u kadyanshi

Bituru uza da u korongi Tagarada u na vi, kasuki ka. U rongo ta kabolo n Yesu. A'ayin a da Yesu panai ikyamba u wene ta n a'eshi a ne. A ukanikorongi u na vi, u yan ta kadyanshi n Atoni a asu kau-kau a kaci ka upana u ikyamba.

Bituru tonuko ta Atoni u da, gba a a'ayin a da baci upana u ikyamba u cina le, a yain mazanga. Cinda Yesu panai ikyamba a'ayin a da wari a likimba, nala dem atoni a ne u kana ta a pana ikyamba. Upana u ikyamba u tsu zuwa ta up-ityanangu u uza u doku u gbama. U tonuko le ta ukuna u shinga u Kashila wa ta n ele a'ayin a da baci dem a ka pana ikyamba.

Gogo-na Atoni a ka pana ta dem ikyamba. Kashila ka ta pini tyoku da wari. Ukanikorongi u na u naka tsu ta ureve a kaci ka ukuna u mayun u kulu u da wa banga tsu a'ayin a da baci dem tsa pana ikyamba. U tonuko tsu ta dem ukuna u shinga u shinga u da tsa yan, a'ayin a da baci tsa pana kayanyan ko tsa pana ikyamba.

Ili i'ya i'ari a Tagarada u na vi

Idyani n kvasu (1:1-2)

Ili i maci i uzuwa u uma (1:3-12)

Kuryongo tyoku u ama a uwulukpi a Kashila (1:13-2:17)

Iryoci i upana u ikyamba u Atoni (2:18-25)

Uwoko u katoni n upana u ikyamba (3:1-4:19)

**Adooki ubana a asu u nkoshi n kuwa ku Atoni
(5:1-11)
Idyani i makorishi (5:12-14)**

¹ Mpa Bituru kasuki ka Yesu Kirisiti Kawauwi da ma sukunku da ukanikorongi u na vi. Ama da Kashila ka dangasai alya ma koronku. Alya aza da a'ari ndishi yavu amoci a uyamba u Pontu, n Galatiya, n Kapadosiya, n Asiya, n Bitiniya.

² Kashila Tata u dangasa da ta caupa, kpm Kulu Keri ku wulukpe da de. An u wokoi i nakai Yesu Kawauwi karinga, mpasa n ne kpm n za da de. Kavasuu ka va ka i tsara tsishinga tsu Kashila ushani, na ndishi n shinga n ne a uma u de.

Atoni a yain n uzuwa u uma

³ Cikpalai Kashila Tata u Asheku a tsunu Yesu Kawauwi. Wa ta n asuvayali cika hal u doku u matsa tsu ilimaci i savu. Adama a ilimaci i nala yi da tsari n uzuwa u uma u da wari n uma, kpm tsu tsari ilimaci yi an a 'yangasai Yesu Kawauwi a ukpa. ⁴ I naka tsu ta dem agadu a da bawu a ka namgba, n a da a'ari sarara kpm a ka kporo wa. Kashila ka ta n agadu a de a zuba, kpm wa asaka ko i te i sawa a da wa. ⁵ I wushuku baci n Kashila, agadu a nala yi a de a da, kpm adama a ucira u ne, wa kanku da ta ili i cingi kotsu i sawa da wa, hal she u wenike iwauwi a a'ayin a makorishi. Gba ama a ka reve ta n ukuna u iwauwi i nala yi.

⁶ Ili i nala yi mayun da, yanyi mazanga adama a ili yi. Shegai gogo-na ya pana ta ikyamba icun kau-kau a ukondo a'ayin kenu. ⁷ Upana u ikyamba vi wa tuwa ta tsara u wenike upityanangu u de u mayun u da. Upityanangu u de wa ta n kalen cika,

u la t̄a zinariya kalen. Akina a tsu zuwa t̄a zinariya u woko sarara, shegai gb̄a n nala u tsu namgba t̄a. A'ayin a d̄a baci a ka wenike Yesu Kawauwi a asu u ama, ya tsar̄a t̄a icikpali, n tsupige, n karinga adama a ukuna u mayun u upityanangu u d̄e. ⁸ Ya ciga t̄a Kawauwi ko an bawu kotsu i wene yi. Ko an u wokoi bawu ya wene yi gogo-na, i wushuku t̄a n eyi. Kpam ko gogo-na ya pana t̄a kayanyan n i yanyi mazanga ma gb̄am bawu ya fuda ya dana. ⁹ Adama a d̄a i wushuki n eyi, ya tsar̄a t̄a kune ku iwauwi i uma u d̄e.

¹⁰ Ntsumate n yan t̄a kadyanshi ka tyoku d̄a Kashil̄a ka wenike ukuna u shinga u ne ara d̄e. A vece t̄a ben tsar̄a a reve ureve u iwauwi i'ya wa nak̄a d̄a. ¹¹ Kulu ku Kawauwi ka t̄a a asuvu a le, kpam ku yan t̄a kadyanshi ka upana u ikyamba u Kawauwi n tsupige tsa tsa tuwa ara ne a'ayin a d̄a baci u panai ikyamba yi. Ntsumate mari ma ciga t̄a n reve ko nwere d̄a, ko kpam nida ukuna u na wa git̄a. ¹² Kashil̄a ka wenike le t̄a ili i'ya a ka yan kadyanshi a kaci ka ili i'ya ya git̄a, shegai a a'ayin a le a d̄a ya git̄a wa. Ukuna u mayun u d̄a a danai vi adama a d̄e a d̄a. Gogo-na Kashil̄a ka suku t̄a Kulu Keri tsar̄a ku banga ama an a yanka d̄a Kadyanshi ka Shinga ka kuɓari. Ko atsumate a zuba a ciga t̄a dem a reve ikuna i na yi.

U kana t̄a vuma rongu uwulukpi

¹³ Adama a ili i na yi gb̄a, yawunsai mai i rot-songusu tyoku d̄a ya kana kaci ka d̄e. Yawunsai tyoku d̄a Kashil̄a ka wenike ukuna u shinga u ne ara d̄e a'ayin a d̄a baci Kawauwi ka gonoi. A'ayin a d̄a baci ya yawunsa a ikuna i na yi, ya tsar̄a t̄a

uzuwa u uma. ¹⁴ Nakai Kashila karinga, kpaci eda mmuku n ne da. Kotsu i gono i kpatala i yain ili i'ya bawu i gain tyoku da i yansai a uma u cau u de wa. A a'ayin a nala yi, i'ari i reve ili i'ya i gain i yain wa. ¹⁵ Kashila ka dangasa da ta i woko mmuku n ne. U kana ta i woko uwulukpi a ili i'ya dem ya yan, tyoku da Kashila kari uwulukpi. ¹⁶ Kpaci Kashila ka dana ta n kaci ka ne, "U kana ta i woko uwulukpi, kpaci mpa ma ta uwulukpi." ◇

¹⁷ Ci bai i tsu yan ta kvasu a asu u Tata da wari a zuba. Aya uza u afada, kpam u tsu wenike ukuna u shinga a asu u vuma te kapala n uza roku wa. Wa yanka da ta afada a una u ili i'ya i yain. U kana ta i naka Kashila karinga a'ayin a da ya yan tsumoci pini naha a likimba. ¹⁸ I reve ta gai Kashila ka tsupa ta ili i pige tsara u wauwa da a uma u cingi u de, an u wokoi isheku i de i yansai dem nala. Kpam ili i'ya u tsupukai vi tyoku u zinariya ko azurufa da i'ari wa, kpaci zinariya ko azurufa u tsu barakpa wa. ¹⁹ U tsupuka da ta na mpasa n Yesu Kawauwi n da mari n kalen cika. Aya Maku ma Kondom ma Kashila† uza da bawu u nusukai ko uza, kpam wa n ashinda wa, ko kenu. ²⁰ Kashila ka dangasa yi ta adama a ukuna u nala vi caupa kahu a yain likimba, kpam a a'ayin a makorishi a na yi Kashila ka suku yi ta a likimba tsara ya dem wene. Kashila ka yan ta ukuna u nala vi gba adama a de. ²¹ Gogo-na i wushuku ta n Kashila adama a Kawauwi. Kpam adama a da Kashila ka 'yangasa yi a ukpa u naka yi kpam tsupige, ya wushuku ta kpam i zuwa uma a asu u Kashila.

◇ 1:16 Adkp. 11:44-45; Adkp. 19:2; Adkp. 20:7.

²² Gogo-na u gan t̄a i cigi atoku a d̄e n uciga u mayun, tyoku d̄a aza d̄a a'ari ilimaci i te a tsu cigamgbana. A wulukpe d̄a t̄a an i wushuki n Kadyanshi ka Shinga, ukuna u maci u d̄a. Adama a nala, i cigamgbana cika, n ucira u atakasuvu a d̄e. ²³ Kashilā ka zuwa t̄a a doku a matsa d̄a ilimaci i savu. Uma u savu u d̄e a asu u isheku i d̄e u d̄a u wut̄ai wa, kpaci uma u d̄a ele a nakā d̄a, wa kotso t̄a a ukpā. Shegai uma u savu u na wa rongo t̄a pini bawu makorishi, kpaci u wut̄a t̄a a asuvu a kadyanshi ka uma u Kashilā, uma u nala vi kpam u d̄a wa kotso wa. ²⁴ Matsumate ma korongu t̄a:

“Ama gbā a'a t̄a tyoku u mete ma ma tsu laza ma kuwa;

tsulobo tsu le kpam tsu laza tsu kotso tyoku u tsulobo tsu ap̄alu a kakamba.

Mete mi ma ekpe,

aku ap̄alu a rukpā a iyamba.

²⁵ Shegai kadyanshi ka Magono ma Zuba ka kotso wa.” ◊

Kadyanshi ka Magono ma Zuba ka nala ki, ka gai Kadyanshi ka Shinga ka tsa tonuko d̄a na vi.

2

¹ Adama a nala, u kanā t̄a i varangu gbā ikuna i cingi i'ya ya yansa. I asakā uyinsā ama. Asakaī u dansakā kaci ka d̄e aza a shinga kpam nala i'ari wa. Kotsu i yain malyon ko kpam i yain kadyanshi ka ka bālā aza roku wa. ² U kanā t̄a i yain maluwa ma uso mani ma mari uwulukpi ma kulu, tsarā i gbonguro n ucira u maci u iwauwi. Sayi adama

◊ 1:25 Isha. 40:6-8.

a mani mi tyoku da baba tsu saka mani, ³ kpaci i pede de ukuna u shinga u Yesu Asheku.

Katali ka uma

⁴ Tuwai ara Yesu Asheku Katali ka uma. Ama ushani a 'yuwan yi ta, shegai Kashila ka dangasa yi kpmam wa ciga yi ta cika. ⁵ Eda dem tyoku u ne da i'ari. Eda atali a uma a da Kashila ka yanka manyan tsara u mai kuwa ku tsugono tsu ne a asuvu a de. Eda dem kabolo ka adarakpi a uwulukpi a da i'ari, tsara i yansa ufarakpa u kulu u da wa zuwa Kashila ka pana kayanyan adama a Yesu Kawauwi. ⁶ Kadyanshi ka Kashila ka tonuko tsu ta ukuna u na vi:

“Wundyai! Ma zuwuka da ta katali ka ka lakai kalen cika a asu u kuma a Sihiyona†* ka n dangasai kpmam ka n lakai uciga. Gba uza da baci u wushuki n eyi, wa yan uwono wa.” ◇

⁷ Mayun da, aya macigi ma de, eda aza da i wushuki n eyi. Shegai aza da a 'yuwan yi, “Katali ka aza a kuma a 'yuwain ka ka lakai cika a asu u kuma.” ◇

⁸ Kadyanshi ka Kashila ka dana ta dem, “Aya katali ka ka tsu zuwa ama a tadatsa, katali ka ka zuwa urukpa.” ◇

A tsu tadatsa ta kpaci a tsu pana kadyanshi ka Kashila a naka ka karinga wa, kpaci nala Kashila ka fobusuko le.

⁹ Shegai eda i'a tyoku u ama a nala yi wa, kpaci eda kaletsu ka ka Kashila ka dangasai ka. Eda kabolo ka adarakpi a da a gbashikai Kashila yavu

* **2:6** Sihiyona kala ka dem ka Urishelima. ◇ **2:6** Isha. 28:16.

◇ **2:7** Ishp. 118:22. ◇ **2:8** Isha. 8:14.

Magono, eda ama a uwulukpi u da, kparam eda kaletsu ka Kashila ka. Kashila ka wutukpa da ta a asuvu a karimbi u tuko da a asu u katyashi ka ne. Gogo-na u kana ta i dansa gba manyan ma pige ma pige ma u yansai. Kadyanshi ka Kashila ka dana ta,

¹⁰ “Caupa, eda kaletsu ka wa;

shagai gogo-na eda kaletsu ka Kashila ka.

Caupa i'ari i wusha asuvayali a Kashila wa; shagai gogo-na i wusha ta asuvayali a ne.” ◇

¹¹ Ama a va, eda amoci a da pini na kparam aza a kugengu. N rono da ta atsuvu kotsu i toni uciga u ili i cingi wa, kpaci a tsu shilakana ta n uma u mayun u de. ¹² Kiranai n tyoku da ya rongo n atoku a de aza da bawu a'ari atoni. Ko a takunku da baci unyushi, eda gai i wenike le ahali a shinga. A ka wushuku ta kparam a naka Kashila tsupige u tuwa baci u yanka likimba afada.

Gorimukoi azapige a de

¹³ Kashila ka ciga da ta i gorimuko gba aza a tsupige. Gorimukoi aza a tsugono, ¹⁴ n azapige a da dem u tsu suku. Yansai nala kpaci magono ma suku le ta tsara a foro gba uza da baci u nusai, kparam u suku le ta tsara a naka uza da yain ili i maci tsupige.

¹⁵ Kashila ka ciga da ta i yain ili i shinga, kparam i yan baci, ya zuwa ta atengeshi a ama da a tsu takunkusu da unyushi a pada bini. ¹⁶ Eda agbashi a da wa; i tsara de kaci ka de. Shagai utsara u kaci u de u naka ucira u da ya yan ili i cingi wa. I tsara ta kaci ka de tsara i woko tyoku u agbashi a Kashila.

◇ **2:10** Hos. 1:6, 9; Hos. 2:23.

¹⁷ Naḱai ya dem karinga kṑam i wenike uciga u maci a asu u ama a Kashila. Naḱai Kashila tsupige kṑam i gorimuko magono.

¹⁸ Agbashi, u kana ta i gorimuko azakuwa a de kṑam i naka le karinga kain dem. Yanyi nala a asu u aza a shinga n aza a ahali a maci, u kana ta dem i yain nala a asu u aza a asuvu a shen.

¹⁹ Uza yan baci unyushi wa, aku u kawunki upana u ikyamba u ili i'ya bawu u yain adama a da u revei Kashila, Kashila ka pana ta kayanyan ka ne.

²⁰ I lekede ili wa a lapa da baci adama a unyushi u da i yain. Shegai Kashila ka zuwuka da ta unu u shinga i pana baci ikyamba a asu u uyan ukuna u shinga. ²¹ Kawauwi ka iryoci i de, u pana ta ikyamba adama a de. Tono i dem nala. Upana u ikyamba wa ta a asuvu a ili i'ya Kashila ka zuwa tsu tsu pana. Kadyanshi ka Kashila ka dana ta:

²² “Kawauwi ka yan unyushi u cingi wa,

kṑam u yinsa uza wa.” ◇

²³ An ama a wisha yi, u tsupa wa. An a zuwa yi u pana ikyamba, u dana ele dem a pana ikyamba wa. U zuwa ta kaci ka ne a akere a Kashila uza da u tsu yan afada a maci. ²⁴ Eyi n kaci ka ne u bidya ta unyushi u cingi u tsunu a ikyamba i ne a mawandambani tsara tsu 'yuwan uyan unyushi, kṑam tsu rongo n ili i shinga. A tansa da ta adama a a'utsu a ne! ²⁵ Caupa i'ari ta a kugengu tyoku u ncon n da n puwain. Shegai gogo-na i gono de a asu u Kaliniki ka de, uza da wa guba uma u de.

◇ 2:22 Isha. 53:9.

3

Tyoku da a tsu yan a asuvu a iyolo

¹ Edā aka she i gorimuko a'ali a de. Ko a'ali a roku a 'yuwain baci uwushuku n Kadyanshi ka Shinga ki, uma u shinga u de wa pura ta ugboji u le kapala n kadyanshi ka roku. ² Yan da a ka yan nala an a wenei uma u shinga n u maci u da ya rongo.

³ Kotsu i matsa i lobono a uwene a a'eshi a aza roku wa. Kotsu i dambula kaci ka de n kuca ku kenji ushani wa, ko ili i udyoku i ikebe wa, ko aminya a ikebe a shinga wa. ⁴ Nala wa. U la ta tsulobo a reve vu n tsulobo tsa tsa wuta a katakasuvu ka vunu. Tsulobo tsu nala tsi tsu tsu wuta ta a asu u uvakunku u kaci n ukana u kaci n kakirani. Wa ta n kalen cika a asu u Kashila kpam wa kotso wa. ⁵ Tyoku da gai aka a uwulukpi a caupa a gonukoi kaci ka le n tsulobo u da la vi. A wushuku ta n Kashila kpam a ka gorimuko a'ali a le. ⁶ Hal gai Saratu,† u gorimuko ta vali u ne Ibrahi, an u isa yi uzakuwa u ne. Edā nkere n ne n da, ya yan baci ukuna u shinga kotsu i asaka uwonvo u bishinka da uyan ili wa.

⁷ Nala dem a'ali, u gan ta i wundi aka a de n karinga. I toni n ele mai tyoku da ya rongo kabolo. Kotsu i ciba an i la le n ucira. I reve kpam an ele dem a wushai kune ku shinga ku uma u Kashila. Ya ciga baci ko i te i kangu kavasuu ka de ubana a asu u Kashila wa, she i yain nala.

Rongoi mai a asuvu a de

⁸ Gogo-na gba de she i wushuku n atoku a de, i kirana n i'ya ya tsarasa atoku a de. I cigamgbana yavu uza n vangu u da i'ari. I pana asuvayali a

atoku, i vakunku kaci ka de. ⁹ Uza u yanka da baci ukuna u cingi, kotsu i yanka yi dem ukuna u cingi wa. Uza roku tonuko da baci kagbani, kotsu i gonuko yi n kagbani wa. Nala gita baci, i zuwuka icun i ama a nala yi unā u shinga. Yanyi nala kpaci Kashilā ka isa da ta tsarā i zuwuka ama unā u shinga. Kpam eda dem Kashilā ka zuwuka da ta unā u shinga. ¹⁰ Kadyanshi ka Kashilā ka dana ta,

“Uza wa ciga baci u rongo n mazanga
n a'ayin a shinga,
u kana ta u kirana n kaletsu ka ne a asu u udansa
kadyanshi ka gbani.

U kirana kpam n unā u ne a asu u uyansa kaβan.

¹¹ U kana ta u suma uyansa ukuna u cingi, u gono u yansa ukuna u maci.

U matsa u wene u rongo n ya dem na ndishi n shinga.

¹² A'eshi a Magono ma Zuba a ka wundya ta aza da a ka yansa ukuna u shinga.

Kpam atsuvu a ne a'a ta ukukpi tsarā u pana ka le a yan baci kavasū.

Shegai u tsu kpatalaka ta aza da a tsu yansa ukuna u cingi kucina.” ◇

¹³⁻¹⁴ Ya wa yanka da ukuna u cingi i'a baci ufoβusi i yanka le ukuna u shinga? Shegai a ka yan da baci mavura an ya yansa ukuna u maci, kotsu i pana uwonvo wa kpam kotsu i namgba asuvu wa. Kashilā ka naka da ta katsupi ka ya yansa ukuna u da wari u shinga. ¹⁵ A unā u da ya dambula a asuvu a de, she i lyaka Kawauwi kayala tyoku u Asheku n katakasuvu ka de. I rongo ufoβusi u da ya wushunku uza da baci dem u wece da i tonuko

◇ 3:12 Ishp. 34:12-16.

yi ilii'ya i zuwai i'ari n uzuwa u uma. Kpam u kaṅa ta i yain u da sawu na unaka tsupige. ¹⁶ I rongo n atakasuvu a de sarara. Pini nala, ama a dansa baci kagbani a kaci ka de, a ka woko ta n uwono a wene baci uma u shinga u da ya rongo an i'ari aza a Kawauwi.

¹⁷ Ciḡai, u la ta tsulobo i yain ukuna u shinga i pana ikyamba, Kashila ka baci ka cigai u da nala. I pana baci ikyamba nala, u la ta tsulobo n u da ya pana ikyamba an i yain ukuna u cingi. ¹⁸ Kawauwi ka pana ta dem ikyamba an u kuwai adama a unyushi u cingi u tsunu, kpam wa doku wa yan nala wa. U yan unyushi u cingi wa, shegai u kuwa ta adama a aza a unyushi u cingi tsara u tuko tsu a asu u Kashila. Ikyamba i ne i kuwa ta, shegai a 'yangasa yi n ucira u Kulu Keri.

¹⁹ Aku ku zuwa yi u ba u yankai a'ulu a akushe a da a'ari a kuwa ku a'ali kuḡari. ²⁰ Ama a na yi a 'yuwan ta upanaka Kashila a'ayin a da Nuhu wa yan kpatsu. Shegai Kashila ka yan ta ahankuri n ele. Ama kulla a uwa ta pini a kpatsu ki, aku Kashila ka wauwa le a mini mi.

²¹ Mini ma nala mi ma woko ta yavu ulyubugu u da wa wauwa da gogo-na. Shegai ulyubugu u uza u ashinda a ikyamba u da wa. U ukpatala ubana a asu u Kashila n katakasuvu ka de sarara da, kpaci a 'yangasa ta Yesu Kawauwi a ukpa. ²² Gogo-na Kawauwi ka ta a zuba ndishi a kukere ku ulyaki ku Kashila. Gba atsumate a zuba n ucira kau-kau u zuba n gba ityoni i cingi u kaṅa ta a panaka yi.

4

Ya dem yain tyoku u Kawauwi

¹ An u wokoi Kawauwi ka panai ikyamba n ikyamba i ne, eḍa dem she i foḅuso i yain nala. Ili i'ya i zuwai tani i'ya, i wushuku baci ya pana ikyamba adama a Kawauwi, uyan u unyushi u cingi u ḍa la vi ya suma. ² Nala kpam ya tono upana u kayanyan u cingi u ikyamba i ḍe wa. Shegai ya yanka t̄a ḡba uma u ḍe manyan i yain i'ya Kashil̄a ka ciga. ³ I'ari i ḅar̄akp̄a t̄a n i yanyi ili i'ya aza ḍa bawu a revei Kashil̄a a ka yansa. Tsishankala tsu kabarikete, uciga u ili i cingi, i rongoi a kuso n i gutukpi, ya yansa kpam abiki a gbani hal n isoshi i kabarikete, i lyakai ameli kayala ili i'ya Kashil̄a ka kovo.

⁴ Aje a cau a ḍe a yan t̄a majiyan an bawu ya bansa kpam n ele a asu u uyansa ukuna u gbani vi. Hal ḡbam a ka yansa kadyanshi ka gbani a kaci ka ḍe adama a ukuna u nala vi. ⁵ Shegai u kaṅa t̄a a wushunku uza ḍa wa tuwa u yanka ya dem afada, aza a uma n aza ḍa a kuwai ḡba. ⁶ Adama a nala, Yesu yanka t̄a aza ḍa a kuwai vi kuḅari ku Kadyanshi ka Shinga. Ko an u wokoi a ka yanka le dem afada tyoku u ama ḍa a buwai, yanka ḍa u yanka le nala tsara a tsara a'ayin a ḍa a ka kpatala a rongo a asuvu a uma tyoku ḍa Kulu ku Kashil̄a ku tonoi n ele.

⁷ Ko ndya wa ya kotso t̄a na n a'ayin kenu. Adama a nala i vakunku asuvu a ḍe, i kaṅa kaci ka ḍe tsara i yain kavas. ⁸ Ḡba ili i'ya ḡbam i lakai kalen i'ya, i lyai kelime n i weniki atoku a ḍe uciga u maci. Ili i'ya kpam i zuwai i'ya, ya cimbusuka t̄a ḡba ikuna i cingi i kakuma i'ya a ka yansa ḍa. ⁹ U kaṅa t̄a i wushi ama a a'uwa a ḍe, kpam kotsu i yain tsali wa.

¹⁰ Kashilā ka naka tā ya dem kune icun kau-kau. U gan tā i yanka ili i'ya Kashilā ka naka da manyan mai, tsara i wenike ukuna u shinga u Kashilā a asu u ama. ¹¹ Avu uza da Kashilā ka naka kune ku kuɓari, vu yain ka yavu Kashilā ka ka dansa a asuvu a vunu. Isā da a isā vu vu ɓanga ama? Ɓanga le n gba ucira u da Kashilā ka naka vu. Pini nala, Kashilā ka wusha tā tsupige tsu ili gba a asu u Yesu Kawauwi. Tsupige tsu Kashilā tsā tā pini hal ubana bawu utyoku, nala kpam dem ucira u ne. Ami.

A ka yan da ta mavura

¹² Ama a va, kotsu i yain majiyan an a ka kon-duso da n upana u ikyamba yavu i'ari a asuvu a akina wa. Kotsu i wene yavu ukuna u roku u da u savu wa. ¹³ Wa laka da ta tsulobo i yain mazanga an eda dem i uwai a asuvu a upana u ikyamba u Kawauwi. Yansai nala ya tsara ta mazanga cika a'ayin a da baci a wenikei tsupige tsu ne. ¹⁴ A yanka da baci kagbani adama a kala ka Kawauwi, i tsā la vi de unā u shinga, kpaci u wenike ta an tsupige tsu Kulu Keri ku Kashilā tsari n ada. ¹⁵ Mai da wari uza u pana ikyamba u wuna baci uma gbani gbani, ko uboku ko kpam ukuna u gbani u roku u da uza u yain. Nala dem wari, uza wa uwusa baci ukuna u ama kabarikete u gan ta u pana ikyamba. ¹⁶ Nala wari wa, a ka yan da baci mavura an i'ari Atoni. Kotsu i pana uwono n upana u ikyamba u nala vi wa. Shegai i cikpala Kashilā an i'ari n kala ka nala ki.

¹⁷ Gogo-na da a'ayin a da Kashilā ka gita afada a ne, kpam wa gita ta u yanka kuwa ku ne. Pini nala,

a gita baci n atsu an tsari Atoni, ndya ya woko makorishi ma aza da a 'yuwain upana Kadyanshi ka Shinga ka ne? ¹⁸ Kadyanshi ka Kashila ka da,

“Iwauwi i tsu tuwa ta a asu u ama a shinga n upana u ikyamba, shegai ama da a 'yuwain upanaka Kashila kpam a tsu nususa, ama a na a ka la ta ama a shinga upana ikyamba.” ◇

¹⁹ Ili i'ya ukuna u na wa tonu u da: va pana baci ikyamba tyoku da Kashila ka ciga, vu lyai kelime n unaka kaci ka vunu a asu Kashila uza da yan vu. Vu lyai kpam kelime n uyansa ili i shinga, wa banga vu ta. Mayun, wa kpa da vu ubanga wa.

5

Uwenishike ubana a asu u nkoshi

¹ Gogo-na nkoshi ma Atoni n da ma dansaka. Mpa dem makoshi ma kpam n wene ta upana u ikyamba u Kirisiti Kawauwi. Ma tonu yi ta a tsupige tsu ne n karinga ka ne u gono baci. ² Tyoku da aliniki a tsu kirana na ncon n le, nala dem u gain i kirana n gba ko ya baci Kashila ka zuwai a akere a de. I yain u da n uciga u de, kotsu i yain tsali an ya yan u da wa. I yain nala an ya pana kayanyan ka ugbashika Kashila. Kotsu i yain nala n i zuwi uma a ili i likimba i'ya ya tuwa da wa. ³ Kotsu i gonuko kaci ka de azapige hal n i baranasi ama kabarikete wa, shegai i gonuko kaci ka de i woko iryoci i shinga. ⁴ Nala kpam, Magono ma Aliniki ma tuwa baci, wa naka da ta funi u tsupige u da bawu wa kporo.

Uwenishike ubana a asu u alobu

◇ 4:18 Tzg. 11:31.

⁵ Edā alobo, panai karinga ka nkoshi. Gbā de kpm she i ɓangamgbana yavu agbashi a da a vakunki kaci ka le, kpaci

“Kashila ka 'yuwan ta aza da a'ari n aradi, u nakai kpm ukuna u shinga u ne a asu u aza da a vakunki kaci ka le.” ◇

⁶ Adama a nala, i vakunku kaci ka de a ucira u Kashila. A'ayin a da baci a'ayin a ne a tuwai, wa radagba da ta a zuba. ⁷ Tsunki Kashila gbā ili i'ya ya balā da, kpaci wa kirana ta n ada.

⁸ Kain dem i rongo a uwundya n afofi. Kalapansi ka utokulalu u de, kpm aya pini wa genge tyoku u gabako wa bolo uza da wa kana tsara u takuma. ⁹ Shamgbai n ucira a ili i'ya i wushuki n i'ya, nala ya yan i lyai kaci ka ne n ucira. U gan ta i reve, gbā Atoni a Asheku ko nte wa a likimba a ka pana ta icun i upana u ikyamba u na vi.

¹⁰ A'ayin a da baci i panai ikyamba kenu, Kashila ka kirana ta n ada, kpm u zuwa atakasuvu a de a gbama, wa zuwa da ta kpm i shamgba n ucira. Yan da Kashila ka tsu yan nala adama a da wari uza u shinga a'ayin dem. U zuwa da ta i tsara tsupige tsu ne bawu utyoku a asu u da u bolomgbono da n Kawauwi. ¹¹ Kashila ka lya ta tsugono tsu ko ndya wa hal ubana bawu utyoku. Ami.

Idyani

¹² Ma wundya ta Sila tyoku u utoku kpm uza da n wushuki n eyi. U banga mu ta a asu u ukorongu maku ma ukanikorongi u na vi. Ili i'ya i zuwai n korongi u da i'ya, tsara n gbamatangu da, kpm

◇ 5:5 Tzg. 3:34.

n tonuko dā tyoku dā Kashilā kari uza u shinga, adama a dā kain dem i rongo uwushukusu n eyi.

¹³ Atoni a Babilā†* a ka sukunku dā tā idyani. Kashilā ka dangasa le tā dem tyoku dā u dangasa dā. Maku ma vā dem Marku wa danasa dā tā.

¹⁴ Damamgbanai a asuvu a uciga u Atoni. Kvasu ka vā ka Kashilā ka nakā dā ndishi n shinga, edā aza dā i'ari aza a Kirisiti Kawauwi.

* **5:13** Arevi a Tagarāda u Kashilā a wushuku tā an Bituru yankai “Babila” manyan tsarā u yain kadyanshi a kaci ka ilyuci i Roma.

**Kazuwamgbani ka savu n Tsikimba n a6on a
da a dangasai a kazuwamgbani ka cau
New Testament in Tsikimba (NI:kdl:Tsikimba)**

copyright © 2010 Wycliffe Bible Translators, Inc.

Language: Tsikimba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tsikimba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files
dated 29 Jan 2022

a4f6a28b-3d6d-50b4-a81b-06ae05a66010